



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL
PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

ZL.Anr.322/2025

PANELI ZGJEDHOR PËR ANKESA DHE PARASHTRESA (PZAP), i përbërë nga gjyqtarët: Violeta Husaj Rugova - kryesuese, Bujar Muzaqi dhe Hajriz Hoti anëtarë, duke vendosur përkitazi me ankesën e Marigona Bytyçi, kandidate për anëtarë të kuvendit komunal në Komunën e Suharekës, nga radhët e Subjektit Politik Lëvizja Vetëvendosje (LVV), të paraqitur kundër Komisionit Qendror të Zgjedhjeve – KQZ, për shkak të parregullsive gjatë numërimit në Qendrën Komunale të Numërimit (QKN) në Suharekë, për Zgjedhjet Lokale, të mbajtura më datë 12 Tetor 2025, në seancën e panelit të mbajtur me 25.10.2025, merr këtë:

V E N D I M

HEDHET E PASAFATSHME ankesa ZL.Anr.322/2025, datë 23.10.2025, e parashtruar nga kandidatja për anëtare të kuvendit komunal në Komunën e Suharekës, Marigona Bytyçi nga radhët e Subjektit Politik Lëvizja Vetëvendosje (LVV), të paraqitur kundër Komisionit Qendror të Zgjedhjeve – KQZ, për shkak të parregullsive gjatë numërimit në Qendrën Komunale të Numërimit (QKN) në Suharekë, për Zgjedhjet Lokale, të mbajtura më datë 12 Tetor 2025.

A r s y e t i m

Me datën 23.10.2025, PZAP-i ka pranuar ankesën e kandidates për anëtare të kuvendit komunal në Komunën e Suharekës, Marigona Bytyçi, nga radhët e Subjektit Politik Lëvizja Vetëvendosje (LVV), me të cilën pretendon se ka dyshime në lidhje me procesin e numërimit dhe procesimit të votave të kandidatëve për kuvend komunal në QKN, për shkak të dyshimit të bazuar se votat e saj janë regjistruar ose kanë kaluar gabimisht të një kandidat tjetër i subjektit politik. Ky dyshim ka ndodh pas publikimit të rezultateve preliminare, ku kishte vërejtur mospërputhje ndërmjet rezultateve reale në teren dhe numrit të votave të regjistruara në sistem. Tutje, kërkon rishikim dhe rinumërimin e votave në qendrat e votimit të Suharekës, për të siguruar transparencë dhe korrektësi në shpalljen e rezultateve.

Në përgjigjen në ankesë të Komisionin Qendror të Zgjedhjeve – KQZ, sqaron se bazuar në nenin 101 të Ligjit Nr. 08/L-228 për Zgjedhjet e Përgjithshme në Republikën e Kosovës (LZP), Rregulloren Zgjedhore Nr. 16/2024, Qendrat Komunale të Numërimit (QKN), Procedura e Veprimit në Qendrën Komunale të Numërimit për Zgjedhjet Lokale 2025, e miratuar më

01.10.2025, Nr.01/2601/2025, përcaktohet procedura e detajuar lidhur me procesin e numërimit në QKN.

Rezultatet preliminare nga vendvotimet mund korrigjohen në Qendrën Komunale të Numërimit, në përputhje me paragrafin 3 të nenit 14 të Rregullores Zgjedhore Nr. 16/2024 për Qendrat Komunale të Numërimit (QKN).

KQZ njofton se rezultatet përfundimtare të procesit zgjedhor, shpallen nga KQZ-ja pas përfundimit të numërimit të të gjitha fletëvotimeve nga vendvotimet e rregullta; fletëvotimeve nga votimi me kusht; fletëvotimet nga votimi i personave me nevoja të veçanta; fletëvotimeve nga votimi jashtë Kosovës; vendosjes për ankesat eventuale nga PZAP dhe Gjykata Supreme dhe pas përfundimit të të gjitha procedurave në QNR, ku rezultati i publikuar është i ankimeshëm nga subjekte politike dhe kandidatët të cilët kanë pretendime në raport me numërimin e votave të tyre. Pra, në momentin e publikimit të rezultateve përfundimtare nga KQZ-ja, palët e pakënaqura në pajtim me nenin 105 të LPZ, pala mund të ushtrojë ankesë në afatin brenda dyzet e tetë (48) orëve në PZAP.

Andaj, pas analizimit të lëndës është vërejtur se pala ankuese ankesën e ka paraqitur jashtë afatit ligjor për paraqitjen e ankesës, sepse pas konfirmimit të ZEKKZ në komunën e Suharekës, aktiviteti i QKN-së është përmbyllur me datën 16.10.2025, në ora 15:45 ndërsa pala ankesën e ka parashtruar me datën 23.10.2025. Pra nuk është brenda afatit ashtu siç parashihet me nenin 105, par.1 të LJP. Ankesat lidhur me administrimin e numërimit në QKN dhe QNR, dorëzohen me shkrim pranë PZAP-së brenda dyzet e tetë (48) orëve nga ndodhja e shkeljes se supozuar.

Paneli Zgjedhor për Ankesa dhe Parashtrës - PZAP, pas shqyrtimit të ankesës dhe shkresave të lëndës konstaton se:

- Ankesa është e pasafatshme

Në këtë rast, PZAP nga shqyrtimi të ankesës se ankuesit, përgjigjen në ankesë të KQZ-së konstatohet se parashtruesi i ankesës ka dorëzuar ankesën me datë 23.10.2025, ku ka pretenduar se ka pasur parregullsi në numërim të votave, ndërsa sipas përgjigjes nga KQZ dhe provave të bashkangjitura procesi i numërimit në Qendër Komunale në Suharekë është përmbyllur me datë 16.10.2025 në ora 15:45.

Me dispozitën e nenit 105 paragrafi 1, në mënyrë decitive parashihet se "Ankesat lidhur me administrimin e numërimit në QKN dhe QNR, dorëzohen me shkrim pranë PZAP-së brenda dyzet e tetë (48) orëve nga ndodhja e shkeljes së supozuar," të Ligjit Nr. 08/L-228 për Zgjedhjet e Përgjithshme në Republikën e Kosovës. Nga kjo kuptohet se ankesa është dorëzuar pas afatit të paraparë ligjor.

Me dispozitën e nenit 9 paragrafi 5 të Rregullores Nr. 01/2025 për Procedurat e Parashtrimit dhe Vendosjes së Ankesave të PZAP-it, parashihet që " Personi mund të paraqes ankesë në PZAP, brenda dyzet e tetë (48) orëve për shkeljet e pretenduara", ndërsa nën paragrafi 5.16.

parashihet që *“Për shkeljet e pretenduara gjatë procesit të administrimit dhe numërimit në QKN dhe QNR”*.

Neni 13, paragrafi 3, nën paragrafi 3.2 i Rregullores Nr.01/2025 për Procedurat e Parashtrimit dhe Vendosjes së Ankesave të PZAP-it, parasheh që: *“PZAP-i e hedhë ankesën kur vlerëson se ajo nuk është dorëzuar në afatin e paraparë ligjor.”*

PZAP Konstaton se nga përgjigja e KQZ është vërtetuar se aktiviteti i QKN-së në Komunën e Suharekës, është përmbyllur më datë 16.10.2025, në ora 15:45, ndërsa ankesa është paraqitur me dt.23.10.2025 në ora 13:35, me çka vërtetohet se ankesa e ankuesit nuk është paraqitur brenda afatit ligjor prej 48 orëve, siç parashihet me nenin 105, paragrafi 1 të Ligjit për Zgjedhjet e Përgjithshme në Republikën e Kosovës.

Paneli, ka gjetur se ankesa e parashtruar nga kandidatja për anëtare të kuvendit komunal në Komunën e Suharekës Marigona Bytyçi, nga radhët e subjektit politik Lëvizja Vetëvendosje (LVV), për shkak të parregullsive në numërim të votave, është parashtruar pas afatit ligjor të përcaktuar me dispozitat e lartcekur, andaj PZAP vendosi që ankesa e ankueses të hedhet si e pasafatshme.

Nga arsyet e theksuara më lartë dhe duke u bazuar nenin 105 paragraf 1 të Ligjit Nr.08/L-228 Për Zgjedhjet e Përgjithshme në Republikën e Kosovës lidhur me nenin 9 paragrafi 5, nenin 13, paragrafi 2, neni 13 paragrafi 3 nën paragrafi 3.2 të Rregullës 01/2025 për Procedurat e Parashtrimit dhe Vendosjes së Ankesave, paneli vendosi si në dispozitiv të këtij vendimi.

PANELI ZGJEDHOR PËR ANKESA DHE PARASHTRESA

ZL.Anr.322/2025, datë 25.10.2025



KËSHILLA JURIDIKE: Kundër këtij vendimi është e lejuar ankesa sipas nenit 118 paragrafi 4 të LZP-së, në Gjykatën Supreme të Kosovës, brenda dyzet e tetë (48) orëve nga momenti i marrjes-pranimi të këtij vendimi.